

CONVENIO DE COLABORACIÓN ENTRE A CONSELLERÍA DO MAR DA XUNTA DE GALICIA E O CONSELLO REGULADOR DA AGRICULTURA ECOLÓXICA DE GALICIA PARA A PROMOCIÓN E MELLORA DA COMERCIALIZACIÓN DOS PRODUTOS ECOLÓXICOS DO MAR NO ANO 2023

MEMORIA XUSTIFICATIVA

Antonio Basanta Fernández, director xeral de Pesca, Acuicultura e Innovación Tecnolóxica da Consellería do Mar, **DECLARA:**

Que esta Dirección Xeral de Pesca, Acuicultura e Innovación Tecnolóxica ten formalizado co Consello Regulador de Agricultura Ecolóxica de Galicia o instrumento convencional arriba referido por un período de vixencia que abrangue dende o 15 de febreiro de 2023 ata o 30 de novembro de 2023.

Que o instrumento convencional ten por obxecto:

Establecer as bases de colaboración entre a Consellería do Mar e o CRAEGA para a coordinación de accións de promoción e mellora da comercialización dos produtos ecolóxicos do mar.

As accións específicas que se van realizar derivadas deste obxecto son as que seguen:

1. Congreso de acuicultura ecolóxica

Realizarase un Congreso dun día de duración, previsiblemente na cidade de Santiago de Compostela, onde participarán destacadas figuras europeas, tanto da produción como da certificación de produción acuícola mariña e terrestre. A actividade realizarase previsiblemente nos meses de marzo ou abril de 2023.

2. Identificación de medios de produción en acuicultura ecolóxica

Identificaranse cun cartel promocional os viveiros flotantes localizados nas rías galegas, dedicados ao cultivo de mexillón ecolóxico. O obxectivo é dar visibilidade o sector produtivo de produtos ecolóxicos do mar.

3. Material de promocional

Deseño, elaboración e distribución de material promocional da acuicultura ecolóxica, para promoción da acuicultura ecolóxica de Galicia. Realizaranse preferentemente prendas de vestir para os operadores.

4. Campaña de promoción

Esta actividade ten como finalidade a promoción dos produtos ecolóxicos do mar a través das redes sociais, con actividades con *bloggers* e influenciadores dos produtos ecolóxicos do mar. Trataríase de achegar estes contidos ao público consumidor deste tipo de produtos.

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar se fundamenta no seguinte:

O Estatuto de Autonomía de Galicia atribúe á Comunidade Autónoma, no seu artigo 28º, a competencia para o desenvolvemento lexislativo e a execución da lexislación do Estado no ámbito da ordenación do sector pesqueiro. Neste sentido o artigo 3.4 da Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, inclúe dentro das materias correspondentes á competencia da

Comunidade Autónoma as relativas á ordenación do sector pesqueiro galego, á ordenación das estruturas, aos mercados, á comercialización, á manipulación, á transformación e á conservación dos produtos pesqueiros e a promoción das estruturas de comercialización mediante o apoio aos sectores produtivos na distribución dos produtos do mar. Así mesmo, no seu artigo 2.7, a citada Lei destaca: "7. Desenvolver e mellorar os procesos de comercialización e transformación dos produtos pesqueiros, así como fomentar o exercicio dun comercio responsable que garanta a calidade, a trazabilidade e a identificación dos produtos".

A Consellería do Mar ten entre os seus obxectivos prioritarios a potenciación, difusión e promoción dos sectores e produtos pesqueiros galegos, co fin de intensificar o coñecemento dos mesmos e incrementar así a súa competitividade.

O Consello Regulador de Agricultura Ecolóxica de Galicia (CRAEGA) é o órgano encargado do control e certificación das producións ecolóxicas en Galicia. O CRAEGA, no seu Regulamento de Funcionamento, publicado no DOG de 14 de abril de 2009, prevé coma unha das súas funcións a de difundir o coñecemento e a aplicación dos sistemas de produción ecolóxica e dos produtos ecolóxicos. Sendo a única entidade, capacitada para executar o investimento inmaterial obxecto deste convenio de colaboración, non será posible promover a concorrência competitiva con outras entidades do sector.

A Consellería do Mar e o CRAEGA están interesados na potenciación do sector da dos produtos ecolóxicos do mar en Galicia, así como na mellora da situación socioeconómica das xentes que viven desta actividade, polo que cómpre establecer as condicións que permitan a coordinación de accións de promoción das produtos ecolóxicos do mar.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, de 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o

recurso á sinatura do instrumento convencional que se pretende, con exclusión doutras figuras.

E para que conste, asínase esta memoria,

Santiago de Compostela,

O director xeral de Pesca, Acuicultura e Innovación Tecnolóxica

Antonio Basanta Fernández

